




ԳԵՐԱԳՈՒՅՆ ՀՈԳԵՎՈՐ ԽՈՐՀՐԴԻ ՆՈՐ ԿԱԶՄԻ
ԱՌԱՋԻՆ ՆՍՏԱՇՐՋԱՆԸ ՄԱՅՐ ԱԹՈՌ
ՍՈՒՐԲ ԷԶՄԻԱԾՆՈՒՄ

Օգոստոսի 1—2-ը Մայր Աթոռ Ս. Էջմիածնում չորս նիստից բաղկացած իր առաջին նստաշրջանը գումարեց Գերագույն Հոգևոր Խորհրդի նոր կազմը, որ նշանակվել էր Ն. Ս. Օ. Տ. Տ. Գարեգին Ա. Ամենայն Հայոց Կաթողիկոսի կողմից՝ Վեհափառ Հայրապետի ընտրությունից հետո, ըստ անցյալ տարիների ավանդության և Ազգային-Եկեղեցական ժողովի որոշման: Նրկատի լուսնալույս, որ Գերագույն Հոգևոր Խորհրդի նոր կազմը, որպես Ամենայն Հայոց Կաթողիկոսի խորհրդատու մարմին, պիտի պաշտոնավարի մինչև առաջիկա Ազգային-Եկեղեցական ժողովը, որը նախատեսված է գումարել երկու տարի հետո, ինչպես նաև հաշվի առնելով, որ նախորդ շրջանից բազմաթիվ հարցեր դեռևս մնում են անլույծ, Վեհափառ Հայրապետը վերանշանակեց Խորհրդի նախկին կազմը՝ լստենապետությամբ Ամենապատիվ Տ. Թորգոմ Պատրիարք Մանուկյանի և Ամենապատիվ Տ. Գարեգին Պատրիարք Գազանճյանի և բաղկացյալ հետևյալ անդամներից. Վաչե արքեպս. Հովսեփյան, Արսեն արքեպս. Բերբերյան, Ներսես արքեպս. Պողոսյան, Գրիգորիս արքեպս. Բունիաթյան, Խաժակ արքեպս. Պարսամյան, Գարեգին արքեպս. Ներսիսյան, Պարգև եպս. Մարտիրոսյան, Տիար Գրիգոր Խանջյան, Տիար Պիոն Հակոբյան, Տիար Հակոբ Փափազյան, Տիար Ռաֆայել Պապայան՝ սույն կազմին ավելացնելով հետևյալ անդամներին՝ Գևորգ արքեպս. Սերայդարյան, Տիրան արքեպս. Կյուրեղյան, Ասողիկ եպս. Արիստակեսյան, Աբրահամ վրդ. Մկրտչյան և պրոֆ. Վլադիմիր Բարխուդարյան:

Նորին Արքությունը Խորհրդի լիազոր-անդամ նշանակեց արտասահմանյան չորս երկրամասերից հետևյալ թեմակալ առաջնորդներին՝ Զավեն արքեպս. Զինչինյան (Միջին Արևելք), Գյուտ արքեպս. Նազգաշյան (Եվրոպա), Գիսակ եպս. Մուրադյան (Հարավային Ամերիկա), Ադան արքեպս. Պալեոզյան (Ծայրագույն Արևելք):

Սույն ընդլայնված կազմը այսուհետև ժողով կգումարի տարին երկու անգամ: Առաջին նիստը նախատեսված է առաջիկա սեպտեմբերի վերջին:

Ներկա նստաշրջանը Վեհարանի դահլիճում բացեց Գարեգին Ա. Կաթողիկոսը՝ աղոթքից հետո տալով ընդարձակ զեկույց՝ իր ընտրությունից հետո կատարված աշխատանքների և ի հայտ եկած հարցերի մասին: Քըննարկվեցին հոգևոր ճեմարանի զարգացման, ներքին թեմերի վարչական կազմակերպման, Մայր Աթոռ Ս. Էջմիածնի հետ թեմերի հարաբերության, Քրիստոնեության ընդունման 1700-ամյակի տոնակատարության Կենտրոնական Հանձնախմբի նշանակման, Մայր Աթոռի ներքին վարչական, տրնտեսական և հաշվական կացության, Մեծի Տանն Կիլիկիո Աթոռի հետ հարաբերության (զեկույցում Վեհափառ Հայրապետի կողմից), Քրիստոնեական դաստիարակության, ինչպես և որոշ թեմերից ներկայացված այլ հարցեր:

Սույն նստաշրջանը առիթ հանդիսացավ Գերագույն Հոգևոր Խորհրդի բոլոր անդամներին նախ մոտիկից տեղեկանալու Մայր Աթոռի գործունեության, հաղորդ դառնալու Վեհափառ Հայրապետի գաղափարներին և առաջիկա ծրագրերին, արտահայտելու իրենց տեսակետները՝ Մայր Աթոռի գործունեության զարգացման և Հայաստանյայց Եկեղեցու առավել ծաղկման վերաբերյալ:

